



Broj:07-07-733-03/05
Mostar, 14.11. 2005. godine

Na osnovu člana 12. stav (1) i člana 14. stav (1) Statuta Regulatorne komisije za električnu energiju u Federaciji Bosne i Hercegovine („Službene novine FBiH“ br. 13/04), člana 31., člana 37. stav (5) i člana 53. stav (2) Poslovnika o radu Regulatorne komisije za električnu energiju u Federaciji Bosne i Hercegovine („Službene novine FBiH“ br. 59/04), te člana 36. stav (6), člana 44. stav 2., član 46. stav (3), člana 48. stav (1) i člana 49. Pravilnika o javnim raspravama i rješavanju zahtjeva i žalbi Regulatorne komisije za električnu energiju u Federaciji Bosne i Hercegovine („Službene novine FBiH“ br. 37/05) i Odluke FERK-a o provođenju prvog tarifnog postupka br. 07-07-745-07/05 od 08.11.2005. godine, rješavajući po zahtjevu za sticanje statusa umješača br. 01-01-763/05 od 11.11.2005. godine i njegovoj izmjeni broj 07-02-600-04/12/05 i broj 07-02-647-06/18/05 od 14.11.2005. godine, podnosioca Aluminij d.d. Mostar, Regulatorna komisija za električnu energiju u FBiH – FERK je, na XVII. redovnoj sjednici, održanoj u Mostaru dana 14.11.2005. godine, donijela slijedeći

ZAKLJUČAK

- I. Odobrava se zahtjev Aluminij d.d. Mostar za sticanje statusa umješača u prvom tarifnom postupku i to u formalnoj raspravi po zahtjevu za odobrenje kratkoročnih marginalnih troškova energije broj 07-02-600/12/05 od 12.09.2005. godine i u formalnoj raspravi po zahtjevu za odobrenje tarifa za djelatnost proizvodnje br. 07-02-647/18/05 od 01.10.2005. godine podnesenom od strane Javnog preduzeća „Elektroprivreda Bosne i Hercegovine“ d.d. Sarajevo.
- II. Umješaču iz tačke I. ovog zaključka dozvoljeno je učestvovati u formalnim raspravama, iznositi dokaze, primjedbe i argumente i pridržavati se postavljenih rokova. Voditelj postupka može ograničiti učešće umješača, u slučajevima kada je to za dobrobit efikasnog vođenja rasprave. Umješač ima i druga prava i obaveze u skladu sa odredbama Poslovnika o radu FERK-a i Pravilnika o javnim raspravama i rješavanju zahtjeva i žalbi FERK-a.
- III. Ovaj zaključak stupa na snagu danom donošenja i objavljuje se na oglasnoj tabli i web stranici FERK-a.



Образложење

Član 53. stav (2) Poslovnika o radu FERK-a propisuju da FERK može dodijeliti status umješača osobi koja dokaže direktan interes za tarifni postupak, koji je različit općem javnom interesu, te da je umješaču omogućeno da učestvuje u postupku, svjedoči i zahtjeva informacije putem člana FERK-a ili voditelja postupka formalne rasprave. Članom 44. stav 2. Pravilnika o javnim raspravama i rješavanju zahtjeva i žalbi FERK-a određeno je da će FERK izmjeniti postupak formalne rasprave ukoliko je to potrebno kako bi se za dva postojeća elektroprivredna preduzeća ubrao postupak po njihovom prvom zahtjevu za odobrenje tarifa u skladu sa FERK-ovim Pravilnikom za tarifnu metodologiju i tarifne postupke („Službene novine FBiH“ br.45/05). U skladu sa članom 46. stav (3) Pravilnika o javnim raspravama i rješavanju zahtjeva i žalbi FERK-a, kriterije za utvrđivanje prava i statusa umješača FERK određuje za svaki konkretan slučaj posebno, zavisno od okolnosti slučaja. Članom 48. stav (1) istog Pravilnika je određeno da FERK o zahtjevu za priznanje statusa umješača odlučuje u roku od 15 dana od dana prijema zahtjeva u FERK. Članom 49. istog Pravilnika propisan je način na koji je umješač ovlašten učestvovati u raspravi.

Odlukom FERK-a o provođenju prvog tarifnog postupka br. 07-07-745-07/05 od 08.11.2005. godine određeno je da status umješača u formalnoj raspravi može steći pravna ili fizička osoba pod uslovom da pravovremeno podnese zahtjev za sticanje statusa umješača, i da ispunjava kriterije: da ima direktan interes u postupku, koji je različit od općeg javnog interesa i da raspolaže podacima i činjenicama od značaja za formalnu raspravu u prvom tarifnom postupku koji se vodi pred FERK-om. FERK je putem Obavještenja za javnost o podnesenim zahtjevima za odobrenje tarifa od strane J.P. »Elektroprivreda Bosne i Hercegovine« d.d Sarajevo i održavanju formalnih rasprava, objavljenog u Dnevnom listu i Dnevnom avazu dana 09.11.2005. godine, odredio da zainteresovane osobe svoje zahtjeve za sticanje statusa umješača mogu FERK-u podnijeti do 14.11. 2005. godine do 12.00. sati.

Dana 11.11.2005. godine, Aluminij d.d. Mostar podnio je zahtjev za sticanje statusa umješača u formalnim raspravama u prvom tarifnom postupku koji je u FERK-u zaprimljen pod brojem 01-01-763/05, kojim je podnosilac zatražio sticanje statusa umješača u prvom tarifnom postupku po zahtjevu za odobrenje tarifa za kratkoročne marginalne troškove energije i u formalnim raspravama po zahtjevima za odobrenje tarifa podnesenim od strane J.P. „Elektroprivreda Bosne i Hercegovine“ d.d. Sarajevo.

U zahtjevu, podnosilac je obrazložio svoj direktni interes za sticanje statusa umješača činjenicom da je on najveći kupac električne energije u Federaciji Bosne i Hercegovine.



FERK je dana 11.11.2005. godine uputio dopis broj 01-01-763-01/05 Aluminij-u d.d. Mostar, u kome je zatražio od Aluminij d.d. Mostar da detaljnije obrazloži svoj direktan interes za sticanje statusa umješača u formalnim raspravama po zahtjevima za odobrenje tarifa za djelatnost proizvodnje, distribucije i snabdijevanja podnesenim od strane J.P.“Elektroprivreda Bosne i Hercegovine“ d.d. Sarajevo i ostavio mu je rok za dostavu pojašnjenja zahtjeva za sticanje statusa umješača do 14.11.2005. godine do 12.00. sati.

Dana 14.11.2005. godine, FERK je od strane Aluminij d.d. Mostar, u ostavljenom roku, zaprimio izmjenu zahtjeva za sticanje statusa umješača u postupcima formalnih rasprava u prvom tarifnom postupku pod brojem 07-02-600-04/12/05 i brojem 07-02-647-06/18/05, u kojima zahtjeva sticanje statusa umješača u prvom tarifnom postupku i to u postupku formalne rasprave po zahtjevu za odobrenje kratkoročnih marginalnih troškova energije i u postupku formalne rasprave po zahtjevu za odobrenje tarifa za djelatnost proizvodnje podnesenim od strane J.P.“Elektroprivreda Bosne i Hercegovine“ d.d. Sarajevo. Izmjenom zahtjeva podnosilac je istakao „da kratkoročni marginalni troškovi energije i cijena proizvodnje električne energije u Elektroprivredi BiH najdirektnije utiču na cijenu električne energije za potrošače na području J.P. Elektroprivrede HZ-HB, od kojih je jedan i Aluminij d.d. Mostar.“

Rješavajući po zahtjevu za sticanje statusa umješača podnosioca u formalnoj raspravi po zahtjevu za odobrenje kratkoročnih marginalnih troškova energije i u formalnoj raspravi po zahtjevu za odobrenje tarifa za djelatnost proizvodnje, utvrđeno je da je podnosilac tarifni kupac Javnog poduzeća “Elektroprivreda Hrvatske zajednice Herceg Bosne“ d.d. Mostar i da iznos kratkoročnih marginalnih troškova i cijene proizvodnje električne energije u proizvodnim objektima Javnog poduzeća “Elektroprivreda Bosne i Hercegovine“ d.d. Sarajevo direktno utiče na njegovo poslovanje, a da i po podacima kojima FERK raspolaže podnosilac predstavlja najvećeg kupca električne energije u Federaciji Bosne i Hercegovine. Naime, prilikom razmatranja zahtjeva podnosioca, FERK je imao u vidu odredbe članova 73. i 74. Pravilnika za tarifnu metodologiju i tarifne postupke FERK-a, kao i činjenicu da je Javno preduzeće “Elektroprivreda Bosne i Hercegovine“ d.d. Sarajevo, u skladu sa navedenim Pravilnikom, ponudilo određenu količinu električne energije Javnom preduzeću “Elektroprivreda Hrvatske zajednice Herceg Bosne“ d.d. Mostar, koju je isti prihvatio, a čiju cijenu će odobriti FERK u prvom tarifnom postupku. FERK je imao u vidu i činjenicu da podnosilac zahtjeva ima direktan interes kao veliki kupac u određivanju cijena proizvodnje električne energije u proizvodnim objektima Javnog preduzeća “Elektroprivreda Bosne i Hercegovine“ d.d. Sarajevo zbog pomoćnih usluga čija cijena će se utvrđivati u prvom tarifnom postupku, u skladu sa usvojenom tarifnom metodologijom FERK-a i DERK-a.



Budući da je podnositelj dokazao postojanje direktnog interesa da učestvuje u formalnoj raspravi u prvom tarifnom postupku po podnesenom zahtjevu za odobrenje kratkoročnih marginalnih troškova energije i po podnesenom zahtjevu za odobrenje tarifa za djelatnost proizvodnje Javnog preduzeća "Elektroprivreda Bosne i Hercegovine" d.d. Sarajevo, odlučeno je kao u dispozitivu ovog zaključka.

Predsjednik FERK-a
Risto Mandrapa dipl.ing.maš.

Dostavljeno:

- Imenovanom
- J.P. „Elektroprivreda Bosne i Hercegovine“ d.d. Sarajevo
- Sektoru za tarife
- Sektoru za pravne poslove
- Sektoru za zajedničke poslove
- Oglasna tabla
- a/a